

## Ályktun alþjóðamálahóps Samfylkingarinnar á landsfundi 2020

Faraldurinn sem kenndur er við Covid 19 og geisað hefur undanfarna mánuði sýnir okkur svo ekki verður um villst hversu alþjóðavæddur heimurinn er orðinn. Hann hefur einnig sýnt okkur fram á það hvað sú alþjóðlega samvinna sem komið hefur verið á fót til að takast á við hnattrænar áskoranir á borð við þennan faraldur er brothætt. Íhaldsöfl hvarvetna hafa nýtt þetta tækifæri til að veða að alþjóðlegri samvinnu, loka landamærum og herða tök sín á borgurunum. Því er mikilvægara nú en um áratuga skeið að alþjóðasinnar láti til sín taka og standi vörð um það sem hefur áunnist frá lokum síðari heimsstyrjaldar í þessum efnun.

Samfylkingin er íslenskur stjórnmálaflokkur og starfar á Íslandi en hefur alþjóðlegan hugmyndagrunn og er hluti af alþjóðahreyfingu jafnaðarmanna. Sem slík lítur hún á hlutverk sitt í stærra samhengi en flest önnur íslensk stjórnmálaöfl. Íslendingar eru svo lánsamir að búa í einu af ríkustu samfélögum jarðar, og því lítur Samfylkingin svo á að það sé skylda okkar sem hér búum að leggja hlutfallslega meira af mörkum á alþjóðlegum vettvangi en gildir um fátækari samfélög, t.a.m. í Evrópu.

Samfylkingin vill nána og góða samvinnu Íslands við önnur lýðræðisríki og virka þátttöku Íslendinga innan alþjóðasamfélagsins.

Lykill að farsæld Íslendinga felst í nánnum samskiptum við aðrar þjóðir, ekki síst innan Evrópu. Samfylkingin telur að efnahagslegum og pólitískum hagsmunum Íslands sé best borgið í Evrópusambandinu. EES-samningurinn er okkur vissulega mikilvægur. Hann telur þó ekki til mikilvægra sviða, svo sem landbúnaðar og byggðamála, gefur ekki færi á upptöku evru og setur EFTA-ríkin í stöðu þiggjenda í Evrópusamstarfinu í stað þess að vera jafngildur og burðugur aðili að sameiginlegum ákvörðunum. Samfylkingin vill taka upp aðildarviðræður við Evrópusambandið á nýjan leik og halda þjóðaratkvæðagreiðslu um aðild þegar aðildarsamningur liggur fyrir.

Ýmis úrlausnarefni nútímans verða ekki leyst nema á alþjóðavettvangi. Loftslagsváin er augljóst dæmi. Mikilvægt er að Ísland taki frumkvæði í þeim málaflokki á alþjóðavísu, þar eð við getum, sökum þekkingar okkar á sjálfbærri orkuframleiðslu og lífríki hafsins verið leiðandi á þeim vettvangi alþjóðlega og verið fyrirmynd fyrir aðra sem vilja feta þann veg.

Framtíð mannkyns byggist á opnum og fordómalausum alþjóðasamskiptum og viljum við að unnið verði gegn hvers kyns öfgahyggju hvarvetna. Samfylkingin vill að Ísland vinni að jöfnuði og mannréttindamálum á alþjóðlegum vettvangi og sé ávallt málsvari friðar, mannúðar, jafnréttis og lýðræðis. Sem aðili að Evrópusambandinu myndi Ísland margfalda slagkraft sinn í þessum efnun.

Ísland á að beita rödd sinni gegn mannréttindabrotum og taka forystu í alþjóðlegri baráttu gegn fordómum, öfgum, mismunun. Við eigum að styðja við réttindabaráttu viðkvæmra hópa á alþjóðavísu. Alþjóðleg þróunarsamvinna er ein af meginstoðum íslenskrar utanríkisstefnu. Íslendingum ber að leggja ríkulega af mörkum til að taka þátt í því alþjóðlega verkefni að draga úr hungri, fátækt, barnadauða og félagslegu ranglæti og stuðla að friði.

Samfylkingin leggur áherslu á að framlög Íslands til þróunarsamvinnu nái viðmiðum SP um 0,7% af vergum þjóðartekjum á næsta kjörtímabili og vill stefna að því að í lok þess verði það sambærilegt við það sem gerist á hinum Norðurlöndunum.

Samfylkingin lítur á menntun, jafnréttismál, málefni barna og viðkvæmra hópa og heilbrigðismál sem mikilvægan þátt þróunarsamvinnu. Leggja þarf sérstaka áherslu á að efla konur til menntunar, atvinnu og sjálfstæðis um allan heim. Forgangsröðun vinnu og fjármagns þarf að beita í þágu baráttu gegn fátækt og mansali ásamt auknum mannréttindum barna, kvenna og hinsegin fólks.

Samfylkingin telur að Ísland hafi mikilvægu hlutverki að gegna á alþjóðavettvangi. Við leggjum áherslu á að fara með utanríkis- og þróunarmálin og beita sér með ofangreindum hætti í þeirri ríkisstjórn sem mynduð verður eftir næstu kosningar.